

Na osnovu člana 10. i 12. Zakona o udruženjima i fondacijama Bosne i Hercegovine ("Službeni glasnik BiH", broj 32/01, 42/03, 63/08, 6/11 i 94/16) Skupština Udruženja Gradskog Kluba vodenih sportova Sarajevo *na sastanku održanom 15.03.2021. godine*, donosi izmijene i dopune

S T A T U T A

GRADSKOG KLUBA VODENIH SPORTOVA

SARAJEVO

(-prečišćeni tekst-)

I OSNOVNE ODREDBE

Član 1.

Udruženje Gradski Klub vodenih sportova Sarajevo (u daljem tekstu: Udruženje) je nestranačka, nepolitična i nevladina organizacija, čija je osnovna djelatnost razvijanje i unapređenje vodenih sportova, ostvarivanje vrhunskih sportskih rezultata i širenje olimpijskih ideala.

Član 2.

Ovim Statutom, u skladu sa članom 12. Zakona o udruženjima i fondacijama Bosne i Hercegovine (u daljem tekstu: Zakon) uređuje se:

- puni i skraćeni naziv, sjedište i znak Udruženja;
- ciljevi i djelatnosti Udruženja;
- postupak za primanje i isključivanje članova;
- organe udruženja, način na koji se biraju, ovlaštenja koja imaju, kvorum i pravila glasanja, trajanje mandata, lice ovlašteno da sazove skupštinu, uslove i način raspuštanja, odnosno prestanka rada;
- pravila za ostvarivanje, korištenja i raspolaganje sredstvima Udruženja, kao i organ ovlašten za nadzor nad korištenjem tih sredstava;
- javnost rada;
- **način podnošenja finansijskog izvještaja i izvještaja o radu;**
- postupak za izmjenu i dopunu Statuta i donošenje drugih općih akata;
- opis oblika i sadržaja pečata **i znaka Udruženja;**
- zastupanje **i predstavljanje** Udruženja;
- uslovi za pripajanje, razdvajanje, transformaciju ili prestanak rada Udruženja;

- postupak za raspolaganje preostalom imovinom i drugim sredstvima u slučaju raspuštanja ili prestanka rada Udruženja, i
- druga pitanja od značaja za organizaciju i djelovanje Udruženja.

II NAZIV, SJEDIŠTE, ZASTUPANJE I PREDSTAVLJANJE

Član 3.

Naziv Udruženja je:

Gradski klub vodenih sportova Sarajevo

Gradski klub vodenih sportova Sarajevo

Градски клуб водених спортова Сарајево

Skraćeno naziv Udruženja je :

GKVS Sarajevo

GKVS Sarajevo

ГКВС Сарајево

Naziv Udruženja na engleskom jeziku je:

City Aquatics Sarajevo

Udruženje može promijeniti svoj naziv i sjedište. Odluku o promjeni naziva i sjedišta donosi Skupština Udruženja.

Član 4.

Sjedište Udruženja je: Bulevar Meša Selimović bb, Sarajevo

Član 5.

Udruženje stiče svojstvo pravnog lica danom upisa u registar kod nadležnog ministarstva.

Član 6.

Udruženje djeluje na cijelom području Bosne i Hercegovine.

Član 7.

Udruženje ima svoj pečat i štambilj.

Pečat je okruglog oblika, promjera 3,0 cm, u kojem je polukružno ispisan latinicom puni naziv: Gradski klub vodenih sportova Sarajevo, sjedište Sarajevo, a u sredini je znak Udruženja.

Štambilj Udruženja je četvrtastog oblika, dužine 3,0 cm i širine 2,0 cm. Vodoravno je ispisan puni naziv, a ispod njega je prostor za upisivanje broja i datuma prijema pošte.

Udruženje ima svoj znak. Znak Udruženja je okruglog oblika sa kružnicom crvene boje, u čijoj je u sredini ispisan veliko slovo S crvene boje Slovo S je oivčeno srebrnom bojom

Član 8.

Radi ostvarivanja ciljeva i programskih zadataka, Udruženje se može učlaniti u druge sportske asocijacije i saveze u skladu sa zakonom i odlukom Upravnog odbora Udruženja.

Član 9.

U donošenju općih i drugih akata, kao i u izgrađivanju prijedloga, stavova, mišljenja i inicijativa, Udruženje je nezavisno od drugih organa i institucija, političkih stranaka, drugih klubova i njihovih udruženja.

III CILJEVI I DJELATNOST UDRUŽENJA

Član 10.

Ciljevi i djelatnosti Udruženja su:

- Zalaganje za razvoj vodenih sportova i svih članova Udruženja;
- Razvijanje maksimalnog sportskog i ličnog potencijala svakog pojedinog člana Udruženja;
- Ostvarivanje vrhunskih sportskih rezultata u sportovima za koji je osnovan;
- Izgrađivanje sportiste kao vrhunskog takmičara i njegove ličnosti u duhu zahtjeva vremena u kojem živimo;
- Osposobljavanje stručnog kadra za rad sa vrhunskim sportistima;
- Rad sa seniorskim, juniorskim, kadetskim i dječijim selekcijama i na taj način okupljanje većeg broja zainteresovanih za bavljenjem sportom;
- Afirmacija sporta;
- Organizovanje obuke neplivača i škole plivanja;
- Širenje olimpijskih ideala i jačanje olimpijskog pokreta;
- Planiranje razvoja u skladu sa Statutom Udruženja;
- Uređenje organizacije Udruženja;

- Organizacija stručnog rada sa odgovarajućim pojedincima ili selekcijama;
- Organizacija takmičenja u BiH;
- Formiranje i održavanje sistema informisanja članova Udruženja i njegovih simpatizera o radu Udruženja;
- Razmjena iskustava Udruženja sa drugim sportskim organizacijama i njihovim asocijacijama u BiH i inostranstvu, te javnim i stručnim institucijama u oblasti fizičke kulture i sporta, kao i drugim pravnim i fizičkim licima;
- Uređenje sistema nagrađivanja i vrednovanja doprinosa ostvarivanju sportskih rezultata kao i rada organa Udruženja;
- Izdavanje knjiga, brošura, biltena i drugih publikacija radi ostvarivanja ciljeva Udruženja;

Programi i projekte od javnog interesa. Programima ili projektima od javnog interesa koje donose institucije Bosne i Hercegovine smatraju se zaokružene i tematski jasno određene aktivnosti čije provođenje dugoročno ili u ograničenom roku djelovanja daje prepoznatljivu dodatnu društvenu vrijednost kojom se podiže kvalitet života pojedinaca, odnosno unapređuje razvoj društvene zajednice. Aktivnostima od javnog interesa udruženja smatraju se posebno aktivnosti udruženja koje doprinose promociji: ljudskih prava, prava lica s invaliditetom, zaštite djece s teškoćama u razvoju, prava nacionalnih manjina, jednakosti i ravnopravnosti u borbi protiv diskriminacije, zaštite od nasilja, aktivnosti djece i mladih, borbe protiv različitih oblika ovisnosti, razvijanje volonterizma, humanitarnih aktivnosti, socijalne zaštite, zaštite okoliša, zaštite prirode, zaštite zdravlja ljudi, umjetnosti, obrazovanja, kulture i svih drugih aktivnosti koje se po svojoj prirodi mogu smatrati djelovanjem od javnog interesa.

Ciljevi i djelatnosti Udruženja ne mogu biti usmjereni na rušenje ustavnog poretka Bosne i Hercegovine, kršenje zaštitivanih ljudskih prava ili izazivanje i poticanje neravnopravnosti, mržnje i netrpeljivosti zasnovane na rasnoj, nacionalnoj, vjerskoj ili drugoj pripadnosti ili opredjeljenju, te ne uključuju angažiranje u predizbornoj kampanji, prikupljanje sredstava za kandidate ili finansiranje kandidata, odnosno političkih stranaka.

Član 11.

Udruženje obavlja srodne privredne djelatnosti koje su neposredno povezane sa ostvarivanjem osnovnih statutarnih ciljeva i aktivnosti Udruženja iz člana 10. ovog statuta (izdavačka djelatnost) s tim da se cjelokupna ostvarena dobit reinvestira u osnovne neprofitne statutarne aktivnosti Udruženja.

Za obavljanje nesrodnih privrednih djelatnosti koje nisu povezane sa statutarnim ciljevima i aktivnostima iz člana 10. ovog statuta Udruženje može obavljati samo preko posebno osnovanog pravnog lica u skladu sa Zakonom.

IV POSTUPAK ZA PRIMANJE I ISKLJUČIVANJE ČLANOVA

Član 12.

Članom Udruženja postaje se upisom ili odlukom Skupštine da se pojedina fizička osoba proglasi članom Udruženja.

Članove Udruženja predstavljaju:

- **Aktivni članovi Udruženja: plivači - osobe koje se aktivno bave sportskom djelatnošću Udruženja u bilo kojoj uzrasnoj kategoriji,**
- **Radni članovi Udruženja: članovi Skupštine Udruženja i Upravnog odbora Udruženja.**

Članstvo u Udruženju za aktivne članove je dobrovoljno, uz mjesečnu članarinu u iznosu koji propisuje Upravni odbor Udruženja.

Članstvo u Udruženju **za radne članove Skupštine** je dobrovoljno, **uz godišnju članarinu u iznosu od 50 KM. Skupština Udruženja može donijeti odluku o promjeni iznosa godišnje članarine za radne članove Udruženja.**

Osnivači **Udruženja** stiču svojstvo člana Udruženja danom registracije Udruženja. **Osnivači Udruženja nisu dužni vršiti plaćanje članarine u Udruženju.**

Radni član Udruženja može postati svako **punoljetno** fizičko lice državljanin Bosne i Hercegovine kao i strani državljanin koji ima boravište u BiH, ako prihvataju statut, i ciljeve Udruženja.

Udruženju mogu pristupiti i pravna lica iz Bosne i Hercegovine i strana pravna lica koja su registrovana u Bosni i Hercegovini, pod uvjetom da prihvate statut i ciljeve Udruženja.

Član 13.

Odluku o prijemu novog člana Udruženja donosi Upravni odbor Udruženja.

Prava i dužnosti **radnih** članova Udruženja su:

- da biraju i budu birani u organe Udruženja;
- da učestvuju u radu Udruženja;
- da razmatraju i ocjenjuju rad organa Udruženja;
- da pokreću pitanje odgovornosti i opoziva članova Udruženja;

- da budu blagovremeno informirani o radu Udruženja;
- da prisustvuju svim skupovima, da daju prijedloge, postavljaju pitanja i traže odgovore;
- da ostvaruju određena prava i pogodnosti, u skladu sa odlukama i drugim aktima Udruženja;
- da se pridržavaju odredbi ovog Statuta;
- da uredno plaćaju **propisanu** članarinu;
- da aktivno učestvuju u ostvarivanju ciljeva i izvršavanju zadataka Udruženja;
- da čuvaju ugled Udruženja.

Članovi u Udruženju su ravnopravni u ostvarivanju svojih prava i dužnosti, **te je prilikom prijema članova u Udruženje zabranjen bilo kakav oblik diskriminacije koja je utvrđena Ustavom i zakonima Bosne i Hercegovine.**

Član 14.

Članstvo u Udruženju prestaje:

- dobrovoljnim istupanjem iz Udruženja;
- isključenjem iz Udruženja, zbog narušavanja ugleda Udruženja ili ne pridržavanja odredbi ovog Statuta;
- **za aktivne članove Udruženja - neplaćanjem članarine duže od tri mjeseca;**
- **za radne članove Udruženja - neplaćanjem propisane godišnje članarine do 30.06. tekuće kalendarske godine za tekuću kalendarsku godinu;**
- prestankom svojstva pravnog lica;
- u slučaju smrti člana **Udruženja;**
- prestankom rada Udruženja.

Svaki član Udruženja može dobrovoljno istupiti iz Udruženja na osnovu pismene izjave o istupanju, koju dostavlja Upravnom odboru Udruženja.

Kao dan prestanka članstva u Udruženju smatra se datum prijema izjave o istupanju.

Član 15.

O članstvu u Udruženju se vodi evidencija. Popis članova Udruženja vodi se elektronski ili na drugi odgovarajući način i sadrži:

- **ime, prezime, odnosno naziv člana, s adresom prebivališta, odnosno sjedišta;**
- **datum pristupanja i broj pristupnice udruženja;**
- **vrstu članstva udruženja, u skladu sa statutom; d) datum prestanka članstva u udruženju.**

Evidenciju o članstvu Udruženja vode odgovorni radni član Udruženja. Odgovornog radnog člana Udruženja imenuje Uprava Udruženja. Evidencija se vodi u elektronskom obliku, a pohranjuje se na službenom računaru Udruženja u sjedištu Udruženja. Najkasnije do kraja januara tekuće kalendarske godine, odgovorni član Udruženja može printati primjerak evidencije o članstvu Udruženja pohraniti u arhivskoj dokumentaciji Udruženja.

Član 16.

Član Udruženja koji grubo krši Statut Udruženja, ne izvršava svoje obaveze prema Udruženju ili svojim postupcima nanosi štetu Udruženju ili narušava ugled Udruženja može biti isključen iz Udruženja.

Prije donošenja odluke o isključenju, član Udruženja mora biti pismeno obaviješten o prijedlogu za isključenje, kao i razlozima zbog kojih se predlaže isključenje.

Odluku o prestanku svojstva člana Udruženja, donosi Upravni odbor Udruženja.

Član koji je nezadovoljan odlukom iz prethodnog stava, može podnijeti žalbu Skupštini Udruženja u roku od 15 dana od dana prijema odluke. Odluka Skupštine po žalbi je konačna.

Član 17.

Skupština Udruženja može donjeti opšti akt, kojim će se u skladu sa Zakonom i ovim statutom, bliže urediti način i postupak stupanja u članstvo i prestanak članstva.

Član 18.

Prestankom članstva u Udruženju članu prestaju sva prava i obaveze u **Udruženju**, s tim da mora izmiriti nastale obaveze u Udruženju.

Član 19.

Član protiv koga je pokrenut postupak za isključenje ne može, do konačne odluke, vršiti bilo kakve funkcije u organima Udruženja.

Član 20.

Član Udruženja koji je brisan iz evidencije članstva ili je isključen iz članstva može na vlastiti zahtjev ili na inicijativu Upravnog odbora Udruženja ponovno postati članom Udruženja, o čemu se odlučuje shodno načinu propisanom za postupak učlanjenja u Udruženje.

V ORGANI UDRUŽENJA

Član 21.

Organi Udruženja su:

1. Skupština
2. Upravni odbor.

V.1. Skupština Udruženja

Član 22.

Skupština Udruženja (u daljem tekstu Skupština) je najviši organ Udruženja, koju **čine registrovani članovi Udruženja**.

Član 23.

Skupština Udruženja **ima sljedeće obaveze i odgovornosti**:

1. donosi Statut, izmjene i dopune Statuta i druga opća akta Udruženja određena Statutom;
2. donosi odluku o promjeni naziva, sjedišta i znaka Udruženja;
3. daje mišljenje o statutima asocijacija i saveza čiji je član Udruženje;
4. imenuje i razrješava članove Upravnog odbora;
5. donosi odluku o imenovanju lica za zastupanje i predstavljanje Udruženja;
6. **imenuje** predsjednika i zamjenika predsjednika Skupštine Udruženja;
7. razmatra i usvaja izvještaje koje je pripremio Upravni odbor Udruženja;
8. usvaja i razmatra program i plan rada Udruženja;
9. donosi **godišnji plan rada, uključujući i finansijski plan** Udruženja i usvaja izvještaj o izvršenju plana **rada** Udruženja;
10. Odlučuje o udruživanju u saveze, pripajanju, razdvajanju, transformaciji, prestanku rada i drugim statusnim promjenama Udruženja;
11. utvrđuje i donosi planove razvoja Udruženja;

12. odlučuje po žalbama članova u drugom stepenu;
13. donosi odluku o znaku Udruženja;
14. odlučuje o nagradama i priznanjima;
15. odlučuje o drugim pitanjima koja nisu stavljena u nadležnost drugih organa Udruženja.

Član 24.

Skupštinu se sastaje po potrebi, a najmanje jednom u toku kalendarske godine.

Skupštinu saziva Predsjednik Skupštine najmanje 15 dana prije njenog zasjedanja. Predsjednik Skupštine dužan je sazvati Skupštinu u slučaju kada to zahtjeva najmanje 1/3 članova Skupštine ili kada to zatraži Upravni odbor Udruženja.

Ako Predsjednik ne sazove Skupštinu u roku od 30 dana u slučajevima iz prethodnog stava, odluku o sazivanju Skupštine donijet će Upravni odbor udruženja.

Član 25.

Skupština može punovažno odlučivati ako je kvorum nadpolovična većina svih članova Skupštine Udruženja, a odluke donosi nadpolovičnom većinom glasova prisutnih članova Skupštine Udruženja.

Odluke koje imaju statusni karakter (spajanje, pripajanje, transformacija, prestanak rada Udruženja) donose se 2/3 većinom svih članova Skupštine Udruženja.

Skupština svoje odluke donosi javnim glasanjem, a samo izuzetno tajnim glasanjem.

Glasanje na Skupštini se vrši pojedinačnim izjašnjavanjem. Svaki član Udruženja ima pravo na jedan glas na skupštini. Članovi mogu glasati "za" ili "protiv" prijedloga o kome se glasa, ili biti "suzdržani" prilikom glasanja.

Ako se većina prisutnih članova Skupštine suzdrži od glasanja, smatra se da je prijedlog odbijen. Ako je ukupan broj glasova "protiv" i "suzdržanih" veći od broja "za", smatra se da je prijedlog odbijen. Ako se poslije glasanja utvrdi da je broj glasova "za" i broj glasova "protiv" zajedno sa brojem suzdržanih od glasanja jednak, vrši se ponovno glasanje. U slučaju da se i ponovnim glasanjem ne dobije potrebna većina, presuđuje glas Predsjednika Skupštine.

Član 26.

Radom Skupštine upravlja Predsjednik Skupštine, a u njegovoj odsutnosti Potpredsjednik Skupštine Udruženja, koje imenuje Skupština na period od četiri godine s mogućnošću ponovnog izbora.

Predsjednik Skupštine **ima sljedeće obaveze i odgovornosti:**

- stara se o organizovanju i radu Skupštine i saziva njene sjednice;
- priprema materijal za njene sjednice,
- predlaže dnevni red sjednice;
- predsjedava sjednicama Skupštine;
- potpisuje akte donesene na Skupštini;
- stara se o izvršenju odluka, zaključaka i drugih akata Skupštine;
- koordinira rad organa i tijela Skupštine;
- vrši i druge poslove koje mu odredi Skupština udruženja u skladu sa Zakonom i ovim Statutom.

Član 27.

Skupština donosi **Poslovnik o radu Skupštine.**

Poslovníkom se bliže uređuju pitanja unutrašnje organizacije i rada Skupštine, uvjeti za rad predstavnika Skupštine, postupak donošenja odluka i drugih općih akata, **te** način glasanja o pojedinim pitanjima od značaja za funkcionisanje Skupštine.

V.2. Upravni odbor

Član 28.

Upravni odbor je izvršni organ Udruženja.

Upravni odbor **čine predsjednik, potpredsjednik, Sekretar i ostali članovi Upravnog odbora. Upravni odbor može imati najviše devet članova.**

Predsjednika, potpredsjednika **i Sekretara** Upravnog odbora bira Upravni odbor iz reda svojih članova.

Članovi Upravnog odbora Udruženja ne moraju biti članovi Skupštine Udruženja.

Član 29.

Članove Upravnog odbora bira i razrješava Skupština udruženja.

Mandat članova Upravnog odbora udruženja je četiri godine, s mogućnošću ponovnog izbora.

Član 30.

Upravni odbor svoje sjednice održava jedanput u tri mjeseca, a vanredno po potrebi.

Upravni odbor radi na sjednici, ako je kvorum nadpolovična većina svih članova Upravnog odbora Udruženja, a odluke donosi nadpolovičnom većinom svih članova Upravnog odbora Udruženja.

Upravni odbor i svaki njegov pojedinačni član su odgovorni Skupštini udruženja.

Član 31.

Upravni odbor Udruženja **ima sljedeće obaveze i odgovornosti:**

- priprema sjednice Skupštine,
- priprema nacrt Statuta, njegove izmjene i dopune i druge akte koje donosi Skupština udruženja;
- provodi politiku, zaključuje i druge odluke koje je donijela Skupština,
- **upravlja** imovinom Udruženja;
- daje prijedloge, mišljenja i inicijative za ostvarivanje ciljeva Udruženja;
- podnosi godišnji ili **periodični** izvještaj o svom radu Skupštini na razmatranje i usvajanje;
- utvrđuje godišnji i polugodišnji obračun o izvršenju plana prihoda i rashoda Udruženja i podnosi ga Skupštini na razmatranje i usvajanje;
- održava stalne kontakte sa javnošću i promoviranje ciljeva Udruženja;
- rješava po žalbama članova u prvom stepenu;
- prati provedbu finasijskog plana rada Udruženja i donosi odluke o upotrebi sredstava;
- obrazuje odbore, stručne timove, sekcije, komisije radi realizacije postavljenih ciljeva Udruženja;
- priprema analize, informacije i druge materijale za Skupštinu udruženja;
- donosi odluku o članarini;
- predlaže programe i planove razvoja Udruženja;
- donosi Poslovnik o svom radu, o radu komisija i drugih tijela;

- priprema i utvrđuje izvještaj o radu za svaku kalendarsku godinu, odnosno period između dvije sjednice Skupštine i podnosi ga Skupštini na razmatranje i usvajanje;
- obavlja i druge poslove u skladu sa zakonom i ovim statutom i koje mu stavi u nadležnost Skupština udruženja.

Član 32.

Članovi Upravnog odbora mogu biti opozvani i prije isteka vremena na koji su izabrani i to:

- na sopstveni zahtjev;
- ako ne prisustvuju sjednici Upravnog odbora udruženja tri puta uzastopno bez opravdanih razloga;
- ako svojim radnjama u vezi sa radom Upravnog odbora ruše ugled Udruženja;
- drugim slučajevima predviđenim Zakonom, ovim statutom i aktima Udruženja.

Član 33.

Predsjednik Upravnog odbora Udruženja **ima sljedeće obaveze i odgovornosti:**

- zastupa i predstavlja Udruženje u pravnom prometu;
- saziva sjednice Upravnog odbora samoinicijativno ili na zahtjev najmanje jedne trećine članova Upravnog odbora i rukovodi njenim radom;
- stara se sprovođenju programa rada, odluka, zaključaka i smjernica Skupštine udruženja;
- izdaje naloge za izvršenje plana prihoda i rashoda Udruženja;
- stara se o provođenju plana rada Upravnog odbora;
- sačinjava godišnji i polugodišnji izvještaj o svom radu i podnosi ga Skupštini na razmatranje i usvajanje;
- potpisuje akte koje donosi Upravni odbor;
- održava stalne kontakte sa javnošću i promoviše ciljeve Udruženja;
- prati realizaciju finasijskog plana Udruženja;
- vrši i druge poslove koje mu odredi Skupština i Upravni odbor Udruženja.

U slučaju odsutnosti ili spriječenosti predsjednika Upravnog odbora zamjenjuje ga Potpredsjednik Upravnog odbora u svim poslovima iz prethodnog stava i poslovima zastupanja i predstavljanja Udruženja u pravnom prometu.

Član 34.

Upravni odbor može, radi efikasnijeg i racionalnijeg izvršavanja svojih poslova i zadataka, posebnom odlukom obrazovati komisije, radna tijela, stručne timove i sekcije.

Odlukom iz prethodnog stava utvrđuje se sastav, djelokrug, broj članova i način ostvarivanja odgovornosti ovih radnih tijela.

Član 35.

Bliži način rada, održavanje sjednica Upravnog odbora može se urediti Poslovníkom koji donosi Upravni odbor Udruženja.

VI JAVNOST RADA I INFORMISANJE**Član 36.**

Rad organa Udruženja i drugih tijela je javan. Javnost rada Udruženja se ostvaruje na način utvrđen zakonom i ovim Statutom.

Član 37.

Organi Udruženja su dužni da članovima Udruženja i ovlaštenim predstavnicima sredstava informisanja učine dostupne podatke, informacije i isprave koje se odnose na rad Udruženja. Prestavnici sredstava informisanja imaju pravo da prisustvuju sjednicama skupštine i da izvještavaju o radu Udruženja.

Član 38.

Članovi Udruženja imaju pravo da budu redovno informisani o radu svih organa Udruženja. Za informisanje članova Udruženja zadužen je Predsjednik Upravnog odbora Udruženja.

Član 39.

Izuzetno, opštim aktom Udruženja može se utvrditi da pojedine informacije, podaci i isprave predstavljaju poslovnu tajnu. Za poslovnu tajnu ne mogu se odrediti podaci koji su javni po zakonu i drugim propisima kao i podaci o kršenju zakona i drugih propisa.

Član 40.

Organi Udruženja mogu donijeti odluku da izdaju redovan ili povremen informativni bilten za javnost.

VII IMOVINA UDRUŽENJA

Član 41.

Imovinu **Udruženja** čine: prava, stvari i novac, koje **Udruženje** stiče u skladu sa Zakonom i ovim Statutom.

Za obaveze prema trećim licima Udruženje odgovara cjelokupnom imovinom.

Član 42.

Prihode Udruženja **čine**:

- članarina;
- dobrovoljni prilozi i pokloni fizičkih i pravnih lica, kako inozemnih tako i domaćih, u gotovini, uslugama ili imovini bilo koje vrste;
- državne subvencije i ugovori sa fizičkim i pravnim licima, kako domaćim tako i inozemnim;
- prihodi od kamata, dividendi, dobiti od kapitala, zakupninama, honorara i sličnih izvora pasivnih prihoda;
- prihodi stečeni kroz ostvarivanje ciljeva i aktivnosti Udruženja u skladu sa zakonom i Statutom Udruženja;
- sredstva dobivena iz opštinskih, kantonalnih, federalnih i državnih izvora;
- drugi izvori u skladu sa Zakonom.

Član 43.

Udruženje je dužno voditi evidenciju o imovini u skladu s važećim propisima.

Udruženje je dužno da uredno vodi poslovne knjige u skladu sa općeprihvaćenim računovodstvenim principima i da sastavlja finansijske izvještaje u skladu sa zakonom, **drugim propisima i ovim Statutom**.

Udruženje je dužno dostaviti finansijski izvještaj iz prethodnog stava ovog člana nadležnom organu prema sjedištu Udruženja i Ministarstvu pravde Bosne i Hercegovine, a najkasnije do 30. aprila tekuće godine za prethodnu poslovnu godinu.

Udruženje je dužno da finansijske izvještaje čuva najmanje pet godina.

Član 44.

Sredstva **Udruženja** mogu se koristiti isključivo za ostvarivanje ciljeva i zadataka predviđenih Statutom **Udruženja**.

Član 45.

Ostvarivanje, korištenje i raspolaganje sredstvima Udruženja utvrđuje se finansijskim planom, kojeg donosi Skupština, na prijedlog predsjednika **Upravnog odbora Udruženja**.

O upotrebi (korištenju) sredstava, u skladu sa finansijskim planom, odlučuje Upravni odbor.

Član 46.

Nadzor nad korištenjem sredstava **Udruženja** vrši Skupština.

Skupština je nadležna za kontrolu svih dokumenata, koje se odnose na finansijsko poslovanje, posebno periodičnih, polugodišnjeg i završnog finansijskog izveštaja.

Dokumenta iz prethodnog stava Skupština razmatra na redovnoj godišnjoj, a po potrebi na vanrednoj sjednici Skupštine.

Član 47.

Upravni odbor je dužan, najmanje jednom godišnje, podnijeti Skupštini izvještaj sa podacima o imovini **Udruženja**, prihodima, rashodima i drugim pitanjima od značaja za raspolaganje imovinom i za finansijsko poslovanje **Udruženja**.

VIII PRIPAJANJE, RAZDVAJANJE, TRANSFORMIRANJE

Član 48.

Udruženje se može razdvojiti ili transformirati samo u drugo udruženje ili fondaciju.

Odluku iz prethodnog stava donosi Skupština 2/3 većinom svih članova Skupštine **Udruženja**.

Ovom odlukom regulira se naziv i sjedište udruženja, te podjela imovine, prava i obaveza, kao i druga pitanja koja se odnose na statusne promjene **Udruženja**.

IX ZASTUPANJE I PREDSTAVLJANJE

Član 49.

Predsjednik Upravnog odbora i **Sekretar** Upravnog odbora Udruženja u okviru svojih ovlašćenja utvrđenim zakonom i statutom zastupaju i predstavljaju Udruženja u pravnom prometu.

Član 50.

U postupcima u kojima Udruženja učestvuje kao stranka radi ostvarivanja svojih prava, dužnosti i odgovornosti pred nadležnim organima, Predsjednik **Upravnog odbora** Udruženja može dati pismenu punomoć za zastupanje advokatu ili drugom stručnom licu.

X OPĆI AKTI UDRUŽENJA

Član 51.

Pored Statuta organi Udruženja mogu donositi i druge opće akte i to:

- odluke;
- pravilnike;
- poslovnike.

Opći akti Udruženja moraju biti u skladu sa Zakonom i Statutom Udruženja.

Član 52.

Odluke, kao opći akti, donose se u slučajevima kada je to izričito utvrđeno Zakonom i ovim Statutom, kao i u drugim slučajevima kada se na opći način uređuje pitanje od značaja za ostvarivanje ciljeva Udruženja.

Član 53.

Pravilnikom se uređuju odnosi između članova Udruženja, kao i međusobni odnosi organa Udruženja u ostvarivanju njihovih nadležnosti.

Član 54.

Poslovníkom se bliže uređuje način rada organa Udruženja.

Član 55.

Originalni primjerci općih akata Udruženja čuvaju se arhivi Udruženja.

XI IZMJENE I DOPUNE STATUTA

Član 56.

Inicijativu za izmjene i dopune Statuta može podnijeti svaki član Udruženja. Inicijativa se podnosi Upravnom odboru pismenim putem i sa odgovarajućim obrazloženjem.

Utvrđeni prijedlog dostavlja se Skupštini, najmanje 30 dana prije održavanja sjednice.

XII PRESTANAK RADA UDRUŽENJA

Član 57.

Udruženje prestaje sa radom u slučaju:

- ako se utvrdi da je Udruženje prestalo djelovati;
- ako nadležno Ministarstvo donese odluku o prestanku rada Udruženja u skladu sa Zakonom.

Udruženja se može pripojiti, razdvojiti ili na drugi način transformisati dvotrećinskom odlukom Skupštine.

Član 58.

O izmjenama i dopunama Statuta odlučuje Skupština **Udruženja** 2/3 većinom glasova svih članova Skupštine Udruženja.

Predsjednik skupštine potpisuje odluku o izmjenama i dopunama statuta koji se smatraju originalima i čuvaju u arhivi Udruženja.

Član 59.

Udruženje može prestati sa radom dobrovoljno, na osnovu odluke Skupštine Udruženja ili po sili Zakona.

Odluka o dobrovoljnom prestanku rada ovog Udruženja donosi se dvotrećinskom većinom glasova svih članova Skupštine Udruženja.

Inicijativu za prestanak rada Udruženja može dati 1/3 članova udruženja u slučaju:

- ako se broj članova Udruženja smanji ispod broja određenog za osnivanje Udruženja,
- kada Udruženje dvije godine za redom ne provodi aktivnosti, a stanje finansijskih sredstava je na nuli,
- U drugim slučajevima utvrđenim Zakonom.

Član 60.

Istovremeno sa odlukom o prestanku rada Udruženja, Skupština donosi plan likvidacije Udruženja, kojim se utvrđuje raspored imovine, prava i obaveza Udruženja. Skupština imenuje likvidatora Udruženja, čija je dužnost da se stara o izvršenju plana likvidacije i koji je ovlašten da zastupa Udruženje u postupku likvidacije i u postupku podnošenja zahtjeva za prijavu prestanka rada Udruženja nadležnim organima.

Imovina kod raspuštanja udruženja, nakon izmirenja svih zakonskih obaveza, dodijeliti će se nekom drugom udruženju koje obavlja iste ili slične djelatnosti, a na osnovu odluke Skupštine Udruženja.

Član 61.

Udruženje prestaje sa radom po sili Zakona, u skladu sa članom 50. i 51. Zakona.

XIII PRELAZNE I ZAVRŠNE ODREDBE

Član 62.

Tumačenje ovih odredbi daje Skupština Udruženja.

Član 63.

Ovaj Statut stupa na snagu danom donošenja, a primjenjivaće se od dana upisa u registar kod nadležnog ministarstva.

Broj: 01/2021

Sarajevo, 15.03.2021. godine

Predsjednik Skupštine

Damir Tabori